

Brouard kasua

Danboreneak eta Alvarezek aske jarraituko dute

Armengol epaileak inputatu gisa mantendu ditu, baina ez du neurririk hartu

Agentziak / Bilbo

Danborenea eta Alvarezen kontrako neurririk ez hartzea erabaki zuen epaileak inputatu gisa mantendu arren. Biek ukatu zuten Brouarden hilketarekin zerikusirik zutela. Danboreneak dio Felipe Gonzalezek hartu zuela GAL sortzeko erabakia, eta, autoak dioenez, politiko eta polizia kargu garrantzitsuek prestatu zuten atentatua.

FELIPE GONZALEZ Espainiako presidente ohiak eman zuen GAL sortzeko agindua, atzo Ricardo Garcia Danborenea PSE-EEko idazkari nagusi ohiak epaileari behin eta berriz esan zionez.

Danboreneak deklaratu zuenez, erakunde terrorista bat sortzeko aukeren gainean galdegin zioten 1983ko udaberrian, eta urte hartako udan bertan bilera batzuk egin ziren erakunde hori behin betiko eratzeko. Haietan Rafael Verak eta EAEko herrialdeetako PSEko hainbat buruzagik hartu zuten parte.

Danborenearen arabera, «uda hartan bertan, Espainiako Estatuak bere gain hartu zuen Frantziako Estatuan legez kanpoko borroka antiterrorista eramateko ardura, eta gertaeren inguruan babes politikoa emateko ardura».

Bestalde, azpimarratu zuenez, ez zuen inolako informaziorik izan Santi Brouarden hilketaren inguruan. Era

berean Danboreneari Amedok egindako akusazioa ukatu zuen, Amedo interes politikoan menpe dagoela gaineratuz.

Politiko garrantzitsuek prestatutako atentatua

Jose Luis Armengol kasuko epaileak egindako autoak, berriz, hauxe dio: «Brouarden hilketa ardura politiko eta polizial garrantzitsuak izandakoek prestatu zuten». «Ziurtasuna dago esateko hilketaren xehetasun guztiak prestatu zituztela Julian Sancristobal Estatuko Segurtasunerako idazkari nagusi ohiak, Jose Amedo komisarioorde ohiak eta Rafael Masa Guardia Zibileko teniente koronel ohiak».

Autoak jarraitzen du esanez atentatuaren ostean azaroan GALEk bere gain hartu zuela hilketa. «Erakunde terrorista agertu zen Mareyren bahiketarekin, 1983an, eta orduan hasi zen Brouarden hilketa prestatzen.

Planchuelo aske da, Komisarioen Sindikatuak bermea ordainduta

■ POLIZIAREN Komisarioen Sindikatuak bost milioi pezetako bermea ordaindu ondoren, aske geratu da Miguel Planchuelo Bilboko Poliziako arduradun nagusi ohia.

Bermea ordaindu bitartean epaitegietan izan zen, eta ez zuten kartzelaratu. Brouarden familiako abokatu Txema Monterok egindako eskaera onartu zuen, beraz, epaileak. Izan ere, Monterok eskatutako berme batekin saihesten zitekeen kartzelaratzeari.

Planchuelok bazekiela-ko 1984an Brouarden kontrako atentatua egingo zela egin zuten eskaera hori.

Autoak dioenez, Planchuelok agindu zuen Rekaldeko auzotik eskolta kentzeko, 1984an. Leku horretan Frantziako kontsulatua zegoen, eta orduko hartan Frantziako interesen kontra erasotzen zuen ETAk. Leku horretan bertan zuen kontsulta Brouardek, eta eskolta kendu ondoren hil zuten.